

Gaston Febus (1331-1391) estoc lo onzau Comte de Foish e Vescomte de Bearn. Neishoc a Ortés o a Foish e establishcòc ua rica cort a Ortés dont las esplendors e la sofisticacion èron raportadas per Joan Froissart dins las suas **Cronicas** de cap tà 1380.

Gaston Febus descriu los sons centres d'interés, atau dins lo prològue deu **Libe de la caça** : « Jo, Gaston(...)me soi delectat especiaument de tres causas : las armas, l'amor e la caça ». Prenguèva la caça fòrça au seriós, en li conferar vertuts a l'encòp fisicas e espiritualas. Considerava la caça coma un espòrt airejat que permetèva de demorar en santat mes longtemps. Pensava tanben qu'un bon crestian se devèva ocupar utilament entà anar au paradís.

Consacrava fòrça temps a la caça e avèva mes de mila siès cents canhs de caça e dus cents chivaus ! Aqueth valent guerrièr avèva lo gost deu dangèr e aimava caçar los bèths gibiers coma lo cèrvi, lo bocardon o lo pòrc-sanglar. Cacèc tota la sua vita e òm dit que morishcòc d'ua ataca en se lavar las mans en tornar d'ua caça a l'ors.

Entrepengoc de redigir, entre 1387 e 1391, un tractat sus l'art de la caça. Dediquèc aqueth libe a Felip lo Hardit, Duc de Borgonha. Aqueth tractat estoc utilizat peus adèptes de l'art cinegetic dinc a la fin deu sègle XVIau, e lo son succès estoc relançat gràcia a las debutas de l'imprimeria. Serà enquèra utilizat a la debuta deu sègle XVIIIau.



Lo libe de la caça

## ISTÒRIA

### LAS FIGURAS BÈRAS E LOS PERSONATGES DE L'ISTÒRIA DE LA GASCONHA

#### ACTIVITAT

- Pòdes trobar coma s'apèran aqueras bèstias en occitan auèi ?  
Rangier, dain, chevre, regnart, chat, blariau
- Vertat o Faus ?
  - Gaston Febus neishoc a Foish.
  - Gaston Febus demorava en Bearn.
  - Gaston Febus caçava entà se neurir.
  - Gaston Febus escrivoc lo Libe de la caça.
  - Gaston Febus èra crestian.



Lo libe de la caça

#### QUESTIONS


- Quina ei la diferéncia entre un libe e un manuscrit ?
- Quin adjectiu ei utilizat entà tot çò que se rapòrta a la caça ?
- Quinas espècias de bèstias èran consideradas coma gibier ?
- Pòdes citar las diferentas partidas deu Libe de la caça ?
- Lo Libe de la caça estoc un succès ?

#### LEXIC

**Cinegetica** : adjectiu que recobrish çò que pertòca la caça

**Prològue** : tèxte a la debuta d'un escrut, avant lo còr de l'obratge (los capitòls)

**Epilògue** : tèxte de conclusion a la fin d'un obratge



Lo libe de la caça

Aqueth libe ei un manuscrit, Gaston Febus causishcòc de tractar de catòrze bèstias que los canhs aimavan caçar : lo cèrvi, lo rène, lo dam, lo boc, lo cabirou, la lèbe, lo lapin, l'ors, lo pòrc-sanglar, lo lop, lo rainard, lo taishon, lo gat sauvatge e la loira. Veng après, ua partida consagrada aus canhs de caça. Las duas prumèras partidas son donc exemples de tractats de naturalisma.

Totes los autes aspèctes de la caça son tractats : las diferentas etapas de la carrièra de caça, las armas e tecnicas de caça. I a tanben ua partida consagrada a la medecina veterinària. Se pòt tanben trobar dins lo libe conselhs de caça entaus senhors los mens rics.

Auèi, òm pòt véser paginas deu manuscrit dins diferents musèus dins lo monde e en França, au castèth de Pau, a la bibliotèca Inguembertine a Carpentras o a la bibliotèca municipal de Lion. La colleccion la mes importanta ei a la bibliotèca nacionala de França.

#### FRISA CRONOLOGICA

<b>1331</b>	<b>1391</b>	<b>de 1387 a 1391</b>
naishença de Gaston Febus	mòrt de Gaston Febus	redaccion deu manuscrit



### LAS FIGURAS BÈRAS E LOS PERSONATGES DE L'ISTÒRIA DE LA GASCONHA

## ISTÒRIA